

Lengdtörper Verzäll

Jean Frohnhoff

Lengdtörper Verzäll

En dr Tied, als et Pröuisse-Sting noch de Wietschäft „am Pröuiss“ haden, dr aule Siepe noch Bruht backden on Wenkelswar verkoppden, dr Spaddel-Hannes ut em Bröckerschött noch op dr Stroot arbedden, on et Kuhleser-Lien noch „Wuschpenn“ söckden — do woren de Lütt noch sparsam on tefriede. Kohm e-ine mem aule Siepe üwer Jeld udder Jeldutjewe te kalle, dann seiht he: „Liewe Jong, we-iste nitt, dat ne Jrosche tiehn Penning sind?“; udder wenn e-ine för öm seiht: „Ihr haht doch su völl Jeld, dat Ihr et nit opkrieje könnt“, dann kiek e-inem dr aule Siepe jrut ahn on sehlden: „Optekrieje es ne Sack voll Jeld — mr kann sujar e Künigri-ek opkrieje“. Och et Pröuisse-Sting woß, dat et sparsame Lütt jowen. Et Sonndeih-Owends hat se Jäst en dr Wietschaft, die dronke för twei Penning e Jläßke Zuckerwahter, weil öne dr Schnaps för fönf Penning te dühr wor. De Lütt verdennenden damols wennig Jeld.

Do moß mr schon de Jröschkes fein tesahme haule on och an ne Nuhtjrosche denke. Versecherunge, wie mr dat hüt hätt, jof et domols noch nit. Vör de Mensche jof et kenn Versecherung — äwwer et Vieh wuht versechert — dat wor en dr Kuh-Laht. Wenn die kle-ine Lütt ne Bauz (Kalb) jrut-jetrocke hadden, on an sonem Diehr kom jätt drahn, on et jing enn, wosten die Lütt nit, an jätt Nöuies te kuhme. Drömm jingen se en de Kuh-Laht, dat se en däm Fall för dat duhde Diehr noch e paar Dahler utbettalt kreje. — Nu konnt et äwwer doch mol fürkuhme, datt en Familje durch Onjlock on Krankhe-it en de Klemm jerohe wor. Dann jow et jätt ut dr „Arms“ (Wohlfahrt). Em alljeme-ine woll äwwer kenne wat met dr Arms de donn hann; do hadden se doch te völl I-er em Liev. Do jow et Wettfraue, die liewer knokehatt arbe-iden, als de Arms en Ansproch te nehme. Sonn däwtige Frau wuhr et Kuhleser Lien. Se wonnden am

Hettkamp em Postwage, wat domols noch e propper Hüßke met nem schöne Bluhme-jättche för dr Dühr wor. En janzt Lengdtörper wor se als brawe, ihrleche on tefriedene Frau bekannt. Em Suhrerdag sohr mr se immer em Bosch — dann dieht se „Wuschpenn“ sühke. De „Wuschpenn“ dat woren die lange Döhn von de Schlie-he (Schlehdorn). Die Döhn affmahke moß schon e beßke jekonnt sinn. Mr kann sech ördentlech dabe-i en de Fenger pittsche. Te Huhs wuhden die Döhn sortiert, fein affjekrazt on jedrüsch. Em Herbstdag wuht doch bold en jiehden Huhs e Ferkel jeschlacht on jewuuscht. Dann konnt et Kuhleser Lien sinn Wuuschpenn pöngelscheswies an dr Mann brenge. Hütt wehde de Wütisch all met Koht to-ejebonge — fröer äwwer mär met Wuuschpenn toe-jestohke, watt bellejer wuhr. Su wuht an alle Ecke on Kannte jespart.

Sparsam on tefri-ede sinn, dat huht mr immer widder van dänn aule Lütt sahre, on vom fölle Utjewe es noch kenne tou watt jekohme. Nu es et och ne Ongersche-id, sparsam udder jierich te sinn. Wenn e-ine Jeld jenoch hätt, on jönnt sech selwer nit Ehte on Drenke — dann es he „jierisch“. Äwwer wenn en dr Huhshaulung Fiddibusse jebruckt wehde, öm Strikkspönnches te spare, dann es dat kenn Jier. En jiedem sparsame Huhshault sohr mr äwwer em Fanüß (Herd) e Beckske met Fiddibusse hange. De beste Fiddibusse liehten sech ut e drüch Stöck Pappelholt afspliehte. Et jow noch so manches, womett de Lütt sparden, et lött sech met e-ins nit alles optelle. Op jiede Fall haden die Lütt fröher mieh Senn för te spare, als hütt. Man mott jo och toue-jewe — se kannten noch kenn „Inflazion“ udder „Währungsschnett“.

Jean Frohnhoff

